

## CI ENCOUMENCE LI DIS DOU PET AU VILAIN

- En paradiz l'esperitable  
Ont grant part la gent charitable.  
Mais cil qu'en eulz n'ont charitei  
4 Ne bien ne foi ne loiauté  
Si ont failli a cele joie,  
Ne ne cuit que ja nuns en joie  
C'il n'a en lui pitié humaine.  
8 Ce di ge por la gent vilainne  
C'onques n'amerent clerc ne prestre,  
Si ne cuit pas que Dieux lor preste  
En paradix ne leu ne place.  
12 Onques a Jhesucrit ne place *f. 63 v<sup>o</sup> 1*  
Que vilainz ait habbergerie  
Avec le fil sainte Marie,  
Car il n'est raisons ne droiture :  
16 Ce trovons nos en escriture.  
Paradix ne pueent avoir  
Por deniers ne por autre avoir,  
Et a enfer ront il failli,  
20 Dont li mauffei suint maubailli :  
Si orroiz par queil mesprison  
Il perdirent cele prison.  
    Jadiz fu .I. vilainz enfers.  
24 Emperelliez estoit enfers  
Por l'arme au vilain resouvoir,  
Ice vos di ge bien par voir.  
Uns deables i est venuz  
28 Par cui li droiz iert maintenuz.  
Un sac de cuir au cul li pent  
Maintenant que laianz descent,  
Car li mauffeiz cuide sans faille  
32 Que l'arme par le cul s'en aille.  
Mais li vilains por garison  
Avoit ce soir prise poizon.  
Tant ot mangié bon buef aux aux  
36 Et dou graz humei qui fu chaux  
que sa pance n'estoit pas mole,  
Ainz li tent con corde a citole.  
N'a mais doute qu'il soit periz :  
40 S'or puet porre, il iert garis.

A cest effort forment s'efforce,  
 A cest effort mest il sa force :  
 Tant s'esforce, tant s'esvertue<sup>1</sup>,  
 44 Tant se torne, tant se remue  
 C'uns pes en saut qui se desroie<sup>2</sup>.  
 Li saz emplit, et cil le loie,  
 Car li maufeiz por penitance *f. 63 v° 2*  
 48 Li ot au piez foullei la pance,  
 Et hon dit bien en reprovier  
 Que trop estraindre fait chier.  
 Tant ala cil qu'il vint a porte  
 52 Atot le pet qu'en sac aporte.  
 En enfer gete sac et tout,  
 Et li pez en sailli a bout.  
 Estes vos chacun des maufeiz  
 56 Mautalentiz et eschauffeiz,  
 Et maudient arme a vilain.  
 Chap[i]tre tindrent l'andemain  
 Et s'acordent a cet acort  
 60 Que jameis nuns arme n'aport  
 Qui de vilain sera issue :  
 Ne puet estre qu'ele ne pue.  
 A ce s'acorderent jadiz  
 64 Qu'en enfer ne en paradix  
 Ne puet vilains entrer sans doute.  
 Oïe aveiz la raison toute.  
 Rutebuez ne seit entremetre  
 68 Ou hom puisse arme a vilain metre,  
 Qu'elle a failli a ces .II. regnes.  
 Or voist chanteir avec les reines,  
 Que c'est li mieudres qu'il i voie ;  
 72 Ou el teigne droite la voie,  
 Por sa penitance aligier,  
 En la terre au peire Audigier :  
 C'est en la terre de Cocuce  
 76 Ou Audigiers chie en s'aumuce<sup>3</sup>.

Explicit.

---

<sup>1</sup> On n'a pas cru pouvoir conserver la leçon de *C*, *esternue*, pour des raisons de sens, et aussi parce que l'emploi réfléchi d'« éternuer » n'est nulle part attesté. Mais la métonymie n'est pas sans charme !

<sup>2</sup> Jeu de mots probable sur *se desreer*, « sortir du rang » (et au figuré « être rempli d'orgueil, de démesure ») et *se desroier*, « sortir de la raie » (cf. T.-L. II, 1734).

<sup>3</sup> Le poème d'*Audigier*, auquel il est fait allusion ici, est une composition burlesque à caractère scatologique, qui revêt la forme d'une brève chanson de geste. Il semble avoir été très apprécié.

*Manuscrits* : A, f. 315 r° ; B, f. 71 v° ; C, f. 63 r° ; I, f. 214 v°. *Texte de C.*

**Titre** : A Le pet au v. ; B Dou pest au v. ; I Le fablel dou pet au v. qui fu portés en enfer - **3**. B verité. - A Ne sens ne bien ne verité ; B Ne bien ne pais ne charité - **29, 30**. A *invertis* - **43**. ABI s'esvertue - **70**. ABI voist, C voit - A Explicit le pet au vilain ; B E. dou pet au v.